



初唐四傑集


楊盈川集

己

詩文分一號 十



土岐文庫
文庫17
W54
6



文庫 17
W54
61



楊盈川集卷八

神道碑

瀘州都督王湛神道碑

惟漢高祖應天順人祭蚩尤於沛庭斬大蛇於豐澤則
豐沛之豪傑乘於雲矣惟漢光武龍飛鳳翔舉新市之
八千破王尋之百萬則南陽之佐命動於天矣我高祖
神堯皇帝以唐侯而建國從晉陽以起兵協和萬邦光
宅天下則太原之衣冠有大勳矣公諱湛字懷元太原
晉陽人也十一代祖卓晉給事中母常山公主河東有

楊盈川集卷八

二 鼓雅居

昭和六年二月一日
土岐善唐氏寄贈

010185191384

湯沐邑因家焉葬於長壽原故鄉有太原之號皇業伊始公以中涓從事賜田鄠杜間今爲雍州人也昔武王定於下人太子賓於上帝基鄠鎬而開國籍神仙以命氏霸則司徒所讓位天子所不臣昶則孝弟於閨門務學於師友豈直橫江斬將南登建業之臺土食金溝北徙邨山之宅自茲厥後數百年間國移三統周人共推其代祿家徙五陵漢朝不易其冠冕曾祖宗邁後魏中書侍郎彭城王府司馬周春官大夫都督晉陽侯祖亮本州主簿司水上士隋贈信州刺史大名革於東魏天

命集於西周宗伯所以辨其儀林衡所以平其守父綽秦孝王府掾仁壽宮監離石郡通守晉陽侯皇朝石州刺史逆賊劉武周攻陷郡城因而遇害贈代州總管諡曰烈侯禮也天造草昧王業艱難周師纔至於太原胡兵遂入於離石負戶而汲不能定西戎之禍析骸而爨不能解南楚之圍仁者殺身以成名君子有死而無貳公承聖賢之末代屬喪亂之宏多天子乘輿方靖秣陵之氣諸侯斧鉞莫救驪山之烽國有命而何言邦無道而斯隱大業之季本州察孝廉非其好也高祖乃操斗

極拜圖書再駕臨於孟津五星合於東井公解衣而濟
策杖而行酈食其之長者逢漢祖而長揖袁曜卿之茂
才見曹公而不拜從平霍邑授金紫光祿大夫入長安
加左光祿大夫歷丞相相國二府典籤參軍事高祖受
禪擢爲通事舍人通直散騎侍郎封金水縣侯食邑七
百戶稍遷虞部郎中丁烈侯艱去職尋起爲隴西別駕
商鄜二州剌史上柱國荊州大都督府司馬冀州剌史
定其封邑誓以河山蕭相立功於萬代留侯決策於干
里願持一郡洛陽之任耿純兼攝八州江東之拜陶侃

龍朔三年遷使持節都督瀘榮溱珍四州諸軍事瀘州
剌史江陽縣地瀘水提封參伐下而爲益州岐山上而
爲井絡尺兵再戢黃昌兩日之歌槃木斯來景伯三年
之化功成露冕歲及懸車歎疏廣之知足慕祁奚之請
老乾封二年上書乞骸骨詔公祿賜同京官仍朝朔望
天子歷吉日協靈辰郊上元祀清廟詔公行太尉事國
之大事攝在有司蒼璧黃琮六玉以昭天地路鼓陰竹
九變而祠祖考名遂身退居常待終山川則羣望並走
星象則中台夜坼春秋九十有三以咸亨三年七月十

七日薨於京師永崇里諡曰敏喪事官給賜物三百段粟三百石葬日車服往還有司監護公幼鍾偏罰毀瘠過人八歲讀書至無母何恃廢書慟哭嘔血數升逮事繼親孝聞州黨恩深母子比王元之事親夢感夫妻等衡卿之至孝年纔一紀有若成人吏部薛公見而稱歎潁川之司馬德操早知劉廙譙國之夏侯泰初深歎樂毅兵次霍邑力戰有功高祖嘉之賜良馬一疋進圍京城爲伏弩所中高祖臨視賜物三百段流血及屨未絕鼓音左輪朱殷豈敢言病武德之始奉使嶺南馮盎等

稽首稱臣獻琛奉贄舍人薛卓遇害北庭詔公責問單于謝罪賜黃金五十斤雜綵二百段南踰漲海北度陰山太中大夫去尉佗之黃屋高車使者作匈奴之鐵券離石之難也枕干而寢見星而行號泣不絕聲者千里水漿不入口者數日同武陵之任龔入構諸羌異河內之張武空持遺劍吳遠由其得銘王哀以之攀柏冀州境內舊多淫祀褻帷按部申明法禁詔書遷秩百姓攀車立廟生祠樹碑頌德亦猶樂巴典郡山鬼潛移張禹牧州江濤不起公出身六十載遺愛二十州遂罷方岳

之官仍居上台之位始於撥亂伊尹之輔成湯終於太
平軒轅之得風后然後拂衣高蹈躬覽載籍著遺誠十
八章盛行於代法文王周易之變象尼父孝經之篇窮
性命之理盡天人之際莊周著論生也若浮史佚立言
沒而不朽越文明元年二月十七日陪葬於獻陵禮也
長子朝散大夫行扶風令遐觀等生芻一束泣血三年
不踰聖人之禮能行大夫之孝京兆載開其新阡昆吾
用昭其舊德百年宮室宛在章臺之東五校軍營依然
茂陵之下銘曰

昔在湯武阿衡尚父下及高光蕭何鄧禹皇天眷命赫
矣高祖惟岳降神克生元輔攻城野戰張飛關羽奇策
密謀荀攸賈詡始陪營衛仍參幕府旌節龍沙軒旗象
浦出臨方岳八調風雨其生也榮池臺鐘鼓其死也哀
陳兵復土孝乎惟孝無父何怙刊石勒銘永傳終古

唐右將軍魏哲神道碑

經天緯地之帝求制禮作樂之才撥亂反正之君資拔
山超海之力繼韶夏而崇謚號非無陣戰之風披皇圖
而稽文武或用干戈之道故能彌綸宗廟彈壓山川苞

四海以爲家一六合而光宅是以二十八宿懸列將而
察休徵三十五星聚天軍而赫符彩呂望垂竿於渭涘
道峻匡周張良授策於圮橋功崇佐漢乃有心如鐵石
氣若風雲洛讖名書河圖祕象青絲電燭歷大塊以三
休碧羽霜淒倚渾天而一息岑彭許允征南鎮北之名
馮異王昌大樹中軍之號杜太行而泥函谷猛氣無前
戮封豕而斬長鯨雄圖不測元戎十乘驅衛霍於前軍
甲士三千列孫吳於後殿秋風白露執金鼓而齊六軍
泰山黃河折銅符而光百代建廟堂之策爲社稷之臣

孰能與於此乎在我右將軍矣公諱哲字知人鉅鹿陽
曲人也七代祖靖非前秦征北大將軍鎮北地上郡其
後子孫因家於寧州襄樂縣開國承家之始誕姓命氏
之源大名發於本支當塗峻於層構三辰鬱鬱天街分
畢昴之都九野茫茫地險列山河之境丞相以萬幾論
道匡大運以震威嚴尙書以八座當官贊金行而標領
袖文昭武穆方駕齊驅公子王孫朱輪華轂大鵬垂翰
馭風伯而指南溟天馬騰姿偶雲師而集東道祖唐隋
天水郡丞河陽都尉瑤林瓊樹擢標格以千尋圓折方

流委波濤而萬頃雄飛有望豈惟京兆之丞陰德不愆
何直丹陽之尉父寶皇朝通議大夫總管府司參軍事
東家孔子至德生於上天南國申侯明靈誕於中嶽君
朝翊贊道先王之法言公府弼諧對上天之休命若夫
聖人作而萬物覩元首明而庶事康日月粲其光華山
川鬱其雲雨則有英靈間出丹陵諧白獸之祥符瑞挺
生黑帝感蒼龍之傑隋珠一寸魏后揚眉和璧千金秦
王動色顏生殆庶聞於竹馬之年揚子參元發自銅車
之歲建情峯而直上疏筆海以橫流彫牆則百堵皆興

峻宇則千門並列可大可久無忘簡易之途爲子爲臣
率由忠孝之境郭林宗之披霧豈敢名言孔文舉之欽
風每相推薦若乃五材並用誰能去兵七德兼施止戈
爲武出師於九天之上暗合兵書取睽於十日之前懸
符射法固以文武之道揄揚滿於域中將相之才藉甚
聞於海內貞觀十五年起家補國子博士喬林掃日驚
白鳳於詞條璧水澄天駭雕龍於義壑班超慷慨常懷
萬里之心季路平生每負三軍之氣十六年勅授左翊
衛北門長上祿賜同京官仍令爲飛騎等講禮鄧司徒

之舊事馬上讀書祭征虜之前聞營中習禮宮花如錦
還臨拜將之壇槐葉成帷復對闕軍之市自皇王眷命
大帝應期運璇衡而制八方調玉燭而臨四極元菟白
狼之野來奉衣簪蟠桃析木之鄉尙迷聲教太宗文皇
帝操斗極把鈞陳因百姓之心問三韓之罪勝殘去殺
上憑宗廟之威禁暴戢姦下藉熊羆之用公丹心白刃
本自輕生六郡三河由來重氣烏江計逆剖項籍於五
侯鹿野懲奸磔蚩尤於四宰二十年詔除游擊將軍右
武侯信義府右果毅都尉長上如故顯慶二年以內憂

解職痛深吳隱哀極顏丁躋厚地以崩魂訴高天而泣
血紫泥垂渙頻降璽書墨纒臨戎遂從金革三年詔除
左衛清宮府左果毅都尉尋圜谷府折衝都尉並長上
如故又以應詔舉對策甲科遷左騎衛郎將於時長榆
歷歷烽火猶驚高柳依依邊風尙急關山夜月遂爲丹
徼之秋西北浮雲翻作穹廬之氣四年詔公爲鐵勒道
行軍總管陳兵玉塞按節金微學常山之蛇擬麗譙之
鶴鐘鼓嘈噴上聞於天旌旗繽紛下蟠於地伏尸百萬
因瀚海而藏舟闢地數千卽燕山而築觀武臣雄略氣

習西零神將鴻圖威加北狄麟德元年詔遷左驍騎中
郎將尋檢校右監門左武衛將軍本官如故昔者封禪
陟云亭之後七十二君圖書出河洛以還三千餘歲振
兵釋旅方崇薦帝之儀道洽功成必致禋天之禮粵以
皇家闢統之五十年今上開基之十七載登封告禪玉
牒金繩建顯號而施尊名揚英聲而騰茂實華夷輯睦
皆承萬歲之恩朝野歡娛咸奉千年之慶乾封元年詔
加明威將軍本官如故大風遺孽叛換青邱小水殘魂
憑陵碧海率百官於文祖尙興彭蠡之師會萬國於塗

山猶有防風之戮是歲也詔公爲遼東道行軍總管軍
營對日兵氣橫天開玉堂而按部坐金城而勒陣闕鞏
之甲犀兕七重餘艗之船舳艫千里駕鼉梁於聖海秦
皇息鞭石之威泛鼇鉤於仙洲愚叟罷移山之力然後
風行電卷斬將屠城塞丹浦之遙源伐黑林之與本王
孫公子名霑皂隸之臣深谷大山境入樵漁之囿二年
詔加上柱國仍檢校安東都護導之以德齊之以刑威
振六官風揚五部兵戈載戢無勞尉候之虞桴鼓希聞
寧有穿窬之盜仰太陽而晞湛露方預四朝臨逝水而

急寒風俄悲一去齊孟嘗之下淚高榭曲池魯司寇之
悲歌頽山壞木長安杳杳還符日近之言京兆悠悠竟
絕天高之問玉關生入自判無期繡服晨還竟知何日
總章二年三月十六日遘疾薨於府第春秋五十有四
嗚呼哀哉詔贈左監門將軍禮也惟公被服忠孝周旋
禮樂仁者見之謂之仁智者見之謂之智研幾冊府金
滕玉版之書索隱兵鈴元女黃公之法每建旗推轂三
令五申躬擐甲冑親當矢石軍并未建如臨盜水之源
車寵未炊似對嗟來之食由是南馳北走東討西征運

之無旁按之無下載筐宮裏遙登將軍之階飛閣星邊
獨列中軍之位雖龍泉匿字薰歇光沈而麟閣飛名天
長地久夫人扶風氏隋濠州刺史圓之孫也五松春豔
牽少女之祥風八桂秋雲降仙娥之寶魄謝家之子歌
柳絮而知慙劉氏之妻頌椒花而自恥三從按禮無虧
丙則之風四德揚藜載闈中閨之訓宿蟠龍於月鏡早
沒鸞牀矯飛翼於霞樓先沈鳳穴珠星璧月終陪季子
之階金鼎銀罇竟列齊侯之寢以貞觀十五年五月五
日終於某所越咸亨元年某月日祔於某原長子瓜州

司倉擇木次子右衛親衛元封等門傳萬石庭列雙珠
花萼爭榮芝蘭藹秀天經地義欽承避席之談日就月
將虔奉趨庭之教變槐檀而瀝膽木石悲酸代霜露以
崩心幽明感動葬之以禮祭之以時生人之本盡矣死
生之義備矣孝子之事親終矣於是門生故吏共緝家
聲才子文人思傳盛德庶使蘭相如之生氣歷千載而
猶存隨武子之餘風登九原而可作其詞曰

文王受命畢公餘慶玉樹聯芳金枝疊映三分並列七
雄齊競建國承家重熙累盛功宣蹈舞德流歌詠河洛

垂文山川出雲驪珠育照虹玉呈文直立孤聳天然不

羣棲遲膠壑悅懌邱墳恥爲儒者自許將軍伊邠不擇

軒轅討逆陣擁遼河兵

一作屯 一作鎮

碣石班超投翰揚

雄執戟弓合三材刀長四尺爰清尉候載澄疆場得人

者昌失人者亡皇思俾乂帝曰明敷幽桂含馥滋蘭吐

芳承天待詔觀國賓王茂績斯遠音聲

一作華

克彰鵬池

淼漫雞山禍亂出閩辭家夷凶靜難金微瓦解玉亭冰

泮扈駕天門陪祠日觀萬邦胥悅千齡啟旦斗骨危城

占蹄舉兵九山霧塞渤海波驚帝赫斯怒王師有征虔

劉北貊戡剪東明遵以文軌宣其德刑太微上將文昌
貴相非熊非羆令聞令望罷踰軍幕榮參武帳本謂來
朝何期返葬原野蕭瑟風烟悽愴天道如何吞恨者多
松風夜響薤露晨歌秋月如練春雲似羅榮華滅後寒
暑經過青烏邱壠白馬山河

唐上騎都尉高君神道碑

南方火德陽精赫雷電之威西陸金行秋令毒風霜之
氣達其變聖人所以定天下之文象其宜聖人所以觀
天下之變或衣裳六合舞羽干而掃虔劉或鐘鼓八紘
用甲兵而誅暴亂若夫皇天失紀彗孛飛流后土不綱
山河崩竭蚩尤食石災害於生人項羽拔山憑陵於上
國天子聞鼓鼙之響思將帥以恭行將軍屬甲冑之容
攬英雄而決勝則風雲潛感豪傑挺生得七星之武曲
破軍受五運之金多木少四時繁弱射連尹於罄山萬
辟太阿殺顏良於官渡然後達人知足徒興白髮之歌
烈士徇名不受黃金之賞與夫棄其筆墨漢家封萬里
之侯稱爾戈矛周王命百夫之長豈可同年而語哉君
諱則字宏規其先渤海人也後代因官遂家於涇州之

安定縣神房阿閣太山橫日觀之峯金闕銀臺滄海蔽
天虛之岸風土形勝關河表裏三分六州之大業師尙
父贊其經綸一匡九合之元勳齊桓公拓其疆場高柴
至德藉東魯之聲名高鳳沈研盛西京之學校英才磊
落而秀發人物蟬聯而間起三光不墜察高星於太紫
之宮八柱無疆奠高嶽於中黃之域曾祖沖北齊鷹揚
即將周右屯衛清宮府別將成軍夜火教戰秋風九天
揚後一之兵六合擁前三之陣張良入漢行觀滅楚之
徵微子奔周坐見亡殷之兆祖赦周褒郡南和縣長陶

元亮攝官於彭澤道契羲皇陳仲弓歷職於太邱德符
星緯飄風驟雨不入灌壇之鄉暴虎蒼鷹潛出瑕邱之
境考才朝議郎上開府孫子荆之天骨亮拔不羣王夷
甫之道心神鋒太峻議郎清秩懸符處士之星開府崇
班上接台階之位君雄心獨斷猛氣無前用兵書六甲
於自然知射法三篇於性道早圖星象管公明懷察變
之心幼識旌旗陶恭祖有行師之略屬隋人板蕩天下
崩離朱陽夾飛鳥之雲紫極現雄雞之象陳兵爭戰窺
玉策於中州姚石壇場竊金符於寓縣我高祖黃雲大

帝白水真人風雷海嶽之純精天地陰陽之正氣媧皇受命殺黑龍而定水災漢祖乘機斬白蛇而開火運君夜觀乾象晝察人情審熒惑之歌謠驗嵩山之讖記關中王氣不勞甘德之言沛國真星無待殷墟之說賊薛舉豺狼梟獍禱杙窮奇守幽隴以行災負關河而作孽天王按劍出軍於玉帳之前猛將分麾受律於金壇之下以義寧二年王師薄伐趙國公長孫無忌精兵若獸利器如霜問君以唯喔之謀待君以心腹之寄營當月暈因八門之死生陣法天星乘五將之關格陰華蓋歷

明堂以我和而制其離以我直而摧其曲敗楚師於柏舉未足權衡執秦俘於崤陵無階等級此實君之功也其年詔授朝散大夫賜物三百段排患而釋滯功成而不居比疏傅以辭榮追留侯之高蹈三靈革故君子於焉待時四海清平謀臣以之歸第自太王基命成康隆玉版之圖高帝受終文武盛金刀之業家給人足天成地平猶勞水旱之餘尙想京坻之積咸亨三年春奉勅於河陽檢校水運使搜粟都尉河堤使者銅橈鐵舳蒼鷹白鶴之船竹箭桃花貝闕龍堂之水引紅粟於淮海

汎歸舟於秦晉遂使齊臣獻納先陳不涸之名漢后絲
綸卽有常平之號望千石之氣可以療饑開萬箱之儲
自然知禮此又君之功也其年詔賜上騎都尉嗟夫河
流曲直天道盈虛鬼神莫之要聖賢莫能預高臺下泣
孟嘗君之惻愴可知梁木與歌孔宣父之平生已矣上
元三年春三月日終於樂邑里之私第享年七十六惟
君魁梧動俗符彩驚人忠孝天資溫良日用一門兄弟
盡同鍾毓之車千里賓朋時命嵇康之駕每至白雲生
海素月流天未嘗不顧眄山河抑揚琴酒馮異之大樹

對諸將而無言子夏之名山謝時人以長往四林遊刃
八水忘筌能祛有溺之因早得無生之法雖十年俱盡
陸士衡之長嘆有徵而千載猶生藺相如之壯心恒在
卽以冬十月丁酉葬於定安東南二十里之平原禮也
陶公相宅郭璞占墳面丹鳳而背元龜兆青烏而徵白
馬三百篇之後卜筮何從二千石之榮子孫無替長男
仁叡中男仁楷少男上護仁昉等或體窮三變潘陸不
足以升堂或力敵萬夫關張不足以扶轂有元方季方
之長幼傳學詩學禮之門風金友玉昆忠臣孝子窮號

積於心髓創鉅纏於肌骨星辰已變昊天無報德之期
霜露潛移君子有終身之感葬之以禮垂制度於三王
思之以時別蒸嘗於四季然後按韋賢之舊德敘潘岳
之家風戴逵銘北海之文張昶刻西山之石若使鄧將
軍之一見自得嘉名魏太祖之來觀懸知絕唱其詞曰
金闕千仞銀宮百常發揮雷雨震動陰陽山水形勝人
神會昌九州霸業賜履勤王樂只君子邦家之光驚雷
氣候大昴徵祥運屬飛海時逢吸霜中原逐鹿西嶽亡
羊漢起高帝周興太王乃披荆棘卽奉壇場國步猶阻

黎元未康將軍不拜使者相望陣合星斗兵符玉璜殲
夷叛逆刷滌邊荒化穆三代時清九皇猶思禮節尙試
堯湯漕通淮海水泛舟航蒼鷹鷁舳紫貝龍堂功立身
退懸車杖鄉百年俄頃萬事悲涼昔時華屋今日元房
平天慘慘半月蒼蒼地謂西郭山言北邙曲池無處松
檟成行

唐昭武校尉曹君神道碑

君諱通字某其先沛國譙人也近代因官遂居於瓜州
之長樂縣故今爲縣人焉顓頊高陽之子孫曹叔振鐸

之苗裔山河白馬漢丞相開一代之基譙沛黃龍魏武帝定三分之業承家卹允嶽峙星羅居雍州之西境斷匈奴之右臂門容駟馬旌旗玉塞之雄坐列三貂人物金行之秀祖某隱居不仕父顯盪寇將軍河庭寶玉廣都鸞鳳或閭閻之內禮敵於諸侯或枹鼓之間威振於千里功則可大以官族而爲官德亦不孤惟將門而有將君天才卓越雄畧縱橫陶謙性好於旛旗王濬志在於長戟東方諫議口誦孫吳諸葛武侯坐吟梁甫屬有隋之末四海分崩皇運之初三光草昧五星同聚田橫

猶在於海中九代飛榮隗囂尙屯於隴右賀拔盛操符誓眾斬木稱兵以被髮左衽之餘負耨机窮竒之號遂欲驅馳我塞北撓亂我河西天子不憚於廟堂鼓其雷電使者相望於道路申其弔伐武德元年乃詔侍中楊仁恭出使先之以德義陳之以兵甲七旬干羽不藉有苗之師萬國侯王坐見防風之戮君深知逆順獨斷芻懷去危卽安轉禍爲福非如馬援遨遊二帝之都不學竇融自保三分之重勅授昭武校尉鮮卑醜類慕容殘孽遷於大棘之城止於小蘭之界雖謂其羣下願聞禮

於上京而拜於將軍遂誇大於諸國貞觀八年詔特進
代國公李靖爲行軍大總管登壇拜將授鉞行師開太
一之三門閉陰符之六甲決勝於俎豆然後折衝萬里
信賢如腹心故能匡正八極君當仁不讓聞義則行從
王粲之戎旅棄班超之筆硯係單于之頸有類長沙斬
樓蘭之王更加平樂詔除上騎都尉車師舊國俯枕前
庭戍已遺墟斜連後壁負天山而板蕩擁蒲海而虔劉
聖人之德非欲窮兵黷武王者之師蓋爲夷凶靖亂十
四年詔兵部尙書侯君集爲行軍大總管軍營玉帳武

略珠韜旌旗蔽於日月金鼓聞於天地安人保大實憑
帷幄之謀斬將奪旗咸藉武夫之力君緬懷高義思報
國恩從來六郡之子是爲萬人之敵梯衝所及攻靡堅
城矛戟所臨野無橫陣一舉而清海外再戰而滌河源
飲至策勳抑惟恒授詔除上柱國君備嘗艱阻頻有戰
功天子聞之累加徵辟募田疇之節羞賣盧龍之塞高
魯連之義請從滄海之遊遂乃散髮鄉亭拂衣邱壑爲
趙魏之老在羲皇之年關內諸公深知郭解洛陽人物
高談劇孟家僮有禮皆使拜賓門客多才咸能市義南

宮養老坐聞鳩杖之榮東岳遊魂俄見鶴書之召以龍
朔元年某月某日終於里第嗚呼哀哉夫人某官之女
也沅湘降祉河洛騰休符玉石之堅貞貫風霜之慘烈
鏡飛天上窺祥鳳於銀臺劍動星文祕蛟龍於玉匣以
某年某月日終越某年月日合葬於某原君孝實因心
忠爲令德鮮花匝樹盡兄弟之歡娛好鳥鳴林展交遊
之宴喜太初朗月俯照金鞍叔夜清風來生寶劍故能
戰必勝攻必取西零種族遙憚武臣北漠酋豪見稱飛
將雖死之日猶生之年園令獨慕於相如漢帝長懷於

李牧長子游擊將軍和政府右果毅都尉上柱國永雄
次子朝散郎行西州柳中縣主簿上騎都尉知君等三
餘廣學百戰雄才就養之方兼申愛敬慎終之道不忘
哀戚雖雨崩防墓無孔子之格言而水齧前和有文王
之故事卽以某年月日改葬於某原長婦某氏卽永雄
之妻也某官之女柔風淑譽習禮聞詩上奉舅姑旁睦
娣姒溫家之婦方歡白玉之臺盧氏之妻空對黃金之
椀先以永淳元年某月日終至是卽陪窆於塋內右翊
衛宏軌兵圖日用劍術天知六郡許其良家三川養其

聲利思宏祖德願敘家風託無媿之銘跋涉載勞於干
仞訪他山之石東西向踰於萬里爛効官昌運負譴明
時始以東宮學士出爲梓州司法傾蓋相逢當仁不讓
庶使見曹娥之碣楊修歎其好辭讀元壽之文高祖稱
其佳作其詞曰

大矣丞相天地寅亮烝哉王侯子孫蕃昌條分葉散源
濬流長金城北峙玉關西候山澤駢羅衣冠輻輳降神
生德興賢誕秀曰萬人英材標國植髫年學劍卅歲論
兵以身許國東討西征皇家啟聖撥亂反正逆賊遊魂

不恭王命亦旣授首河西大定蕞爾湟中車書未同帝
赫斯怒攢其英雄風行電轉谷靜山空二庭遺孽交河
路絕天子聞輦元戎案節王師無戰海外有截歸我田
廬功成不居歲云秋矣日月其除壽非金石命也何如
孝乎兄弟葬之以禮蓼蓼者莪人生苦多言猶在耳邈
若山河

楊盈川集卷八

番禺梁于渭初校
番禺沈葆和覆校

楊盈川集卷九

墓誌

鄴國公墓誌銘

永昌元年春二月甲申朔鄴國公薨公諱柔字懷順宏農人也縣犯太原王廟諱改為仙掌焉公即隋煬帝之元孫元德太子之曾孫恭帝之孫鄴國公行基之子粵若稽古崇德象賢統承先王修其禮物惟丞相保寧西漢惟太尉亮弼東朝功書王家澤流后嗣亦猶司徒之敬敷五教殷德日新后稷之播時百穀周有大賚隋高

祖昧且不顯齊聖廣淵皇天眷佑誕受顧命恭皇帝遜位明敷能讓天下作賓皇室與國咸休系承百代之宗國稱二王之後公山河積氣清白餘基孝友著於閨門信義行於邦國縱心妙用不出戶庭覃思典墳不窺園圃及其上公傳位命服居前有怵惕之心無驕矜之色漢之平帝猶敬劉歆魯之戴公尙聞商頌大唐貴爲辰極富有寰瀛用三王之禮以同天地奏八代之樂以答神祇郊上元定泰時金繩玉匣日觀登封左个西偏明堂布政未嘗不虞賓在列周客來庭禮秩尊於百僚贊

拜絕於羣后猶能小心畏懼恪慎肅恭上帝時歆下人祇協以爲藩屏以訓子孫稟命不融享年五十有五嗚呼哀哉越某月日葬於某原嗣子某官生盡其孝死盡其哀學不替於爲喪禮有踰於鑽燧卜其宅兆俾無後艱述其家風謂之不朽銘曰

有客有客乘殷之馬建于上公尹茲東夏有客有客乘殷之輅作賓王家率由典故天之蒼蒼人之云亡栢櫃成行魂歸故鄉

常州刺史伯父東平楊公墓誌銘

楊氏之先其來尚矣在皇爲皇軒在帝爲帝譽在王爲
周武在霸爲晉文此之謂不朽西京爲丞相東漢爲司
徒魏室爲九卿晉朝爲八座此之謂代祿公諱德裔宏
農華陰人也卽常州刺史華山公之元孫左衛將軍武
安公之長子生而岐嶷代不乏賢事親以孝聞在鄉黨
恂恂如也始以父任爲太子左千牛備身轉秀容華亭
福昌雒四縣令詔封東平公策勳上柱國是時也天子
側席求賢勵精爲化以公屈臨小縣焉用牛刀處治中
別駕之任方展其驥足耳擢拜潁州幽州二司馬寬以

制猛嚴而不殘每行縣錄囚徒其所平反者十八九詔
徵尙書郎御史中丞饒譽亮直有王臣之節尋以公事
去官復拜饒州括州越州都督府三州長史在會稽引
陂水溉田數千頃人獲其利於今稱之焉遷棣曹恒常
四州刺史歷政清白爲當時所重於是覽先賢之言知
止足之分罷歸初服告老私庭乃率羣從子弟營別業
於宜神鄉之望仙里其制宅也宗廟爲先廡庫爲次居
室爲後喟然而言曰古人所謂歌於斯哭於斯聚國族
於斯者吾知之矣維文明元年夏四月某日薨於正寢

春秋八十有五嗚呼哀哉公簡貴不交流俗非禮不動
非禮不行望之儼然聽其言也厲博觀史籍不學書生
尋章摘句而已至於臺閣舊事法令科條莫不成誦在
心若指諸掌凡爲尙書郎二年御史中丞滿歲宰人者
四縣上佐及專城者九州盛德形容被於歌詠門生故
吏遍於天下永淳二年輿駕幸東都召見公於金城頓
訪以得失公採撫羣言悉心以對高宗嗟嘆者良久賜
几杖粟帛鄉里榮之一子令珍早亡朝夕溫清者四女
公慨然有喪明之痛因不豫彌留遺命以弟之子神毅
爲後越垂拱元年春二月某日與夫人隴西李氏合葬
於某原禮也遠近會葬千餘人操筆而爲誄者以百數
嗚呼哀哉銘曰

巖巖華山峻極于天上侵神氣下固窮泉夫惟積德生
我大賢其一滔滔河水中國之紀派別九都經營萬里夫
惟積潤生我君子其二惟忻之城惟華之亭宜陽之地益
部之星公爲其宰不殞其名其三汝陰之國薊門之北陂
水朝黃燕雲夜黑公爲其佐日宣其德其四入踐郎官舍
香握蘭來居白室直繩明筆潘子一除士師三黜其五邑

號鄱陽山名括蒼東南之美吳會之鄉展其驥足實賴
王祥其四州之大是稱都會千里之榮卽分麾蓋言旋
舊國保茲耆艾其生爲貴臣死爲貴神陰堂是夜古木
非春鄧攸無子天道何親其

杜袁州墓誌銘

公諱某字某京兆杜陵人也高辛之撫教萬方堯舜之
平章百姓傳稱聖人之後易曰積善之家在夏爲御龍
在周爲唐杜三王以降百代可知車服出於南陽衣冠
襲於京兆曾祖榮業後魏秦州別駕祖良宇文朝復州

長史父舉唐易州司兵參軍事事端履道操矢安貞厚
於天爵薄於人位闕里之庭學夫詩禮太邱之門執其
羔雁公孝慈而敬威莊而安狎貫義方周覽典籍服其
服則文之以君子之容遂其辭則實之以君子之德起
家左翊衛選授貝州司倉參軍事出自中禁在於外臺
謹其蓋藏實其倉庾尋遷蓬州咸安許州長社湘州洛
陽三縣令地方百里官歷三城言非法度不出於口行
非公道不萌於心令不肅而威宣教不舒而德洽轉虢
州司馬制授朝散大夫婺州司馬又遷蘇州長史加中

散大夫鸞鳳不棲於枳棘鸞雀不集於梧桐宜得其材
非公莫可我大周誕受萬國寵綏四方建官惟賢垂拱
而理乃命公爲朝議大夫使持節袁州諸軍事守袁州
刺史天王之使列國之君發其德音而勸不用賞正其
顏色而禁不用刑德成而位尊名遂而身退乞骸告老
謝病言歸以某年月日終於淮海之館春秋七十有七
嗚呼哀哉夫人太原王氏魏驃騎大將軍新昌公平之
曾孫唐蜀王府典軍上柱國志隆之女也纂承洪烈嗣
續徽音中外柔嘉小大懷睦夫人之化國風美於鵲巢

寶劍之沈夜氣衝於牛斗享年四十八嗚呼咸亨二年
某月日終長社之官第維天授三年春二月合祔於杜
陵之平原禮也王人弔祭儀仗官給長子某官等毀形
於骨痛貫於心父母哀哀昊天莫報佳城鬱鬱白日何
年願述餘風式銘幽壤銘曰

鳳凰鳴矣于彼高岡顯允君子邦家之光猗歟令德秀
於閨房歲云暮矣池樹荒涼死則同穴如何彼蒼

隰川縣令李公墓誌銘

公諱嘉字大善隴西成紀人也趙郡太守雍州大中正

上開府永康公之孫幽州都督鎮軍大將軍上柱國
丹陽公之子重華以文明允塞謨九德於臯陶仲尼以
恭儉溫良繙六經於柱史將軍李牧人王願其同時河
尹李膺天下思其執御况乎衣冠代美祖考家聲占於
月爲宗周之姬姓誓以山河則炎漢之劉氏公門承
相地積英靈望之儼然橫斷山而鬱起聽其言也注
而不竭玉則秦王所見天照白虹劍則殷帝所傳
紫氣假使蔡中郎之博學郭有道之人倫何嘗不
粲而倒屣爲茅容而下拜起家爲太子左千衛

以調升也按河圖於玉版震一索而爲長男考天象於
銅渾心前星而爲太子直城霞遶曲障雲平出入青榜
之門周旋黑衣之列稍遷越王府戶曹參軍越之建國
也地居南斗之躔王之受封也禮極東門之拜廊霍所
以隆懿親其和所以資明德一言而干楚后卽從雲夢
之畋三見而說趙王仍襲上卿之印又遷隰川令川原
爽塏風俗和平晉獻公之允夷吾是邑代恭王之子郢
客爲侯陽泉依六壁之城孟津合三溪之水公以輜車
就列墨綬當官有蠶績於郕人用牛刀於魯邑市廛無

競不假鞭絲學校方興惟聞擊石諸侯取其軌則四海
瞻其儀表爲杜陵之男子誰繼後曹蔑鄉里之小人願
辭彭澤於是退歸初服就養私門戲嬰兒於階下扶老
生於井上尋丁外艱哀毀踰制加入一等_除就三年服
闋襲封丹陽公勳上騎都尉公以安車禮盛賜杖年高
被服先王之道優游太平之化左琴右書謀孫翼子居
常飽德不言何氏之萬錢直置當仁豈特于公之駟馬
清風可賞必有鸞鳳相期白雪時遊多以神仙見屬義
形於金石節貫於松筠西山五日之朝將化羽而生翼

北海明年之驗便展辰而至已以永淳元年八月二十
一日終於京師道政里之私第享年七十二嗚呼哀哉
長子隨州光化縣令守節等哀纏弔鶴痛結鄰人孝之
始也則身體髮膚所以全其性孝之終也則衣裳棺槨
所以成其禮天高八萬想京兆而何從地濶三阡對佳
城而有恨越宏道二年歲次甲申正月甲申朔二十六
日巳酉陪葬於昭陵東南之平原烟樗櫟庸材瓶簪小
器仰惟先友叨雅契於金環俯逮婚_嘉一作_嘉姻荷深知於
玉潤南容有道僅聞將聖之言東武建塋俄述安仁之

賦嗚呼哀哉乃作銘曰

爰初帝子堯之大理降及真人國之柱史衣冠百代慶
靈千祀吉兆占熊嘉名贈鯉聿修厥德必復其始大孝
因心至仁由已肅成門內章華宮裏父任爲郎學優則
從一作仕陽山之曲蜀江之浹月旦乘鳧田間狎雉其心
若鏡其直如矢亟改炎涼罷歸桑梓象賢舊國安車暮
齒忽愴池臺俄悲生死郭門一望郊烟四起夫復何言
平生已矣

李懷州墓誌銘

公諱冲寂字廣德隴西狄道人也左衛大將軍西平王
之孫荊州大都督漢陽王之子今上之族兄也原夫帝
堯之緒運期受於天漢顓頊之胄大命集於皇家光耀
則若木十枝波瀾則長河九派或中軍按部金鼓所以
節其聲或刺史班條冕旒所以彰其德信可謂玉林多
寶天族多奇以御邦家以藩王室者也公山河誕慶辰
昂發祥金多木少孔文舉之天骨玉潔冰清華子魚之
神彩南陽季恭偉懸識宰臣沛國趙元儒竊知公望編
漢皇之兄弟列周室之邢茅天下稱其八才吾家號爲

千里初任尙舍直長稍遷城門郎仍奉勅於宏文館讀書掌舍諸宮城門列校詔詣東觀有黃香之博聞賜其制書有班游之廣學尋授駕部員外郎轉金部郎中又勅公爲戎州道支度軍糧使天府充物軍儲委積振南官之紱冕譽表三臺歷西蜀之江山榮高駟馬遷太府鴻臚二少卿丁艱去職楊播之登太府初聞累遷之命鄭默之拜鴻臚遽見終喪之禮孔宣尼旣祥五日彈不成聲孟獻子加人一等懸而不樂服闋歷青德齊徐四州刺史東臨巨海西至長原或全齊歷下之軍或大禹

徐方之地任隆荆部陶侃八州寄重潯陽桓伊十郡遷宣州刺史吳王舊邑楚國先封江迴鵲尾之城山枕梅根之冶蜀郡無此計吏則惟薦張堪潁川尤多璽書則但稱黃霸巡察使以尤異聞遷陝州刺史觀其井邑號仲上陽之故墟度其川原周公分陝之遺跡唇齒通其列國咽喉壯其天險善人爲政無待於百年童子行謠先符於兩日於斯時也天以順動帝以會昌修封禪於岱嶽作明堂於汶上望山川而遍羣神執玉帛而朝萬國制公檢校司理常伯文昌之省遙接太階建禮之門

旁連複道萬幾匡贊八座謀猷既陪軒帝之巡仍覲漢家之事屬阿孫南走憑斗骨而爲城居衛滿東亡界朝鮮而爲役屬乘輿乃誅後至討不庭申命六事之人以問三韓之罪制曰師出遼左卿可爲北道主人檢校營州都督石門山險銅鼎河流天文則營室辨方地象則神臺鎮野供其行李鄭國有東道之名爲我主人常山當北州之寄遼東平以功遷蒲州刺史堯都蒲坂舜耕歷山昭襄王始作河橋穆天子至於雷首汝南朕之心腹遂拜韓崇河東吾之股肱時徵季布遷少府監忠信

爲主楊阜齊衡清白在官常林比德又除蒲州刺史諸童之逢迎郭伋再牧并州百姓之願得耿純復臨東郡孝敬皇帝國之儲嗣乾之長男四極奏於重光二年賓於上帝崇其諡號用黃屋於羽儀卜其園塋象元宮之制度山陵之建也以公檢校將作大匠游衣漢寢之外抱劍橋山之下百工畢力陳琳於是乎躬親諸吏懷恩魏霸於是乎無謫遷銀青光祿大夫行少府監若夫協時月乘天正秦人往事遊別館而祈年漢宮舊儀下明庭而避暑上幸九成宮以公檢校右領軍將軍本官如

故董司戎政以戒不虞七校陳其甲兵五營按其車服
領軍之職用文武於紀瞻右軍之官敘勤勞於常惠尋
以公事免左授歸州司馬楚之舊也始得子男之田夔
之先也裁爲附庸之國人同賈傅路似長岑伯騫有聲
於鄉里仲任見知於筆札制遷中大夫行兗州都督府
長史大庭之庫少昊之墟上直降婁金精吐宿旁瞻日
觀木德題山別乘初迎將宣萬邦之化佩刀終爽徒見
三公之服以永淳元年某月日行次唐州方城縣遇疾
薨朝廷聞而傷之贈懷州刺史公嚴而有禮直而能和

行孝立身移忠事主生知者上重之以八索九邱道在
斯尊加之以文昭武穆故能入登常伯出踐方州爲六
卿之儀表發三軍之號令列長戟於門前羅曲旃於堂
下子孫朝夕玉樹相輝賓客送迎玳簪交映悲夫展禽
三黜安仁再免奚辭棘署俯集桐華慘舒則不繫陰陽
喜愠則不形顏色何嗟及矣竟遊東岱之山無所不知
旋閉南陽之墓二年某月日葬於萬年縣龜川鄉之平
原長子某官某次子某官某箕裘必復花萼生光隣人
泣其悲慟明主憂其毀瘠觀其弔客不無雙鶴之徵察

其成墳自有百鳥之感森森隴樹漠漠郊烟右元灞而浩蕩左驪山而起伏杜陵萬家之邑非復城池滕公駟馬之銘不知年代銘曰

高陽積德武昭餘慶宅鎬開基封唐起聖協和萬國平章百姓天敘諸侯禮樂宗正其一周之曲阜漢之平陸地

則葭葦祥惟嶽瀆鄉黨稱善閨庭雍穆始拜城門卽遊天祿其二太微之位益部之星卿則有六四至丹青州則

有九八牧專城既踐臺閣仍司甲兵其三倚伏無兆遭隨有運賈誼從王桓譚佐郡自忘寵辱曾無善愠人士何

歸天高不問其四東都門外長樂宮邊白馬旒旒青鳥墓

田秋梓夾路碑石書年百代之後南陽之阡其五

從弟去盈墓誌銘

古者黃帝軒轅氏沒帝嚳高辛氏作幼而徇齊長而敦敏則天下之人用其教者百年忠肅恭懿宣慈惠和則天下之人謂之才者八子赤烏流而白魚躍有周武之興王彤弓一而娘矢千有晉文之啟霸雖隱公遜位哀侯失國而文之昭也武之穆也司徒爲五教之官有社稷焉有黎人焉丞相臨萬幾之職峻函鼎盛赫奔於朱

輪河洛台階昭彰於白玉積善餘慶信而有徵國子進士楊肅盈字流謙宏農華陰人也曾祖諱初周大將軍隋宗正卿常州刺史順陽公皇朝左光祿大夫華山郡開國公食邑本鄉二千五百戶唐虞之稷契魏晉之裴王晏嬰可以事百君皋陶爲之謨九德磨蓋兵馬人知牧伯之尊名山大川地積公侯之氣王考諱安僞鄭王充逼授二十人將封鄩國公尋謀歸順爲充所害皇朝贈大將軍旌忠烈也陶謙雅尙祖述雄心會天子之蒙塵見諸侯之釋位雖陳平去就潛懷仗劍之謀而石勒

凶殘遂及推牆之禍父某潤州句容遂州長江二縣令朝散大夫行鄩州司馬文武兼備清白在躬人無間言位不充量四方取則孔宣父之踐中都百里非才龐士元之登別駕若夫庭生玉樹身帶金縷有衛玠之風神有張良之容貌蔣琬之譏盛允責在司空陳蕃之對薛勤志清天下觀其昏定晨省立身揚名怪草蔚其休徵神魚會其冥感莊公獨嘆聞穎叔之純行有道相推見茅容之盡禮則閨門雍穆以孝聞也輔仁會友合志同方晏平仲之善交鮑叔牙之知我張堪死日妻子惟託

於朱暉劉惔生平風月每思於元度則朋友之德若蘭
芬也朱穆好學中食忘餐譙周研精欣然獨笑張華四
海之內若指諸掌班固百家之言無不窮究鈞深致遠
悅邱墳也八音繁會五色章明動天地而感鬼神序人
倫而成孝敬陽臺並作楚襄王賜雲夢之田上林同時
漢武帝給尙書之筆則瓊敷玉藻未足多也自攝齊東
序撰杖西膠推宰我之能言貴顏回之有德成如麟角
道尊於壁水之前翼若鴻毛俯拾於金門之下方將咫
尺宣室扈從明庭申賈誼之忠讜盡揚雄之規諫豫章

七載擢修幹而聳長條有鳥三年搏積風而運滄海豈
期數有迤否天無皂白苗而不秀秀而不實蓋有是夫
古人有言歿而不朽者此之謂也春秋二十有六以上
元三年五月二十二日歿於京師勝業里嗚呼哀哉至
儀鳳四年十二月二日歸葬於華陰之某原不忘本也
山河鬱鬱松柏蒼蒼骨肉閉兮歸后土魂魄遊兮思故
鄉三荆搖落五都悲涼痛門戶之無主悼人琴之兩亡
嗚呼哀哉銘曰

高掌遠蹠濁涇清渭天子諸侯司空太尉星辰鼓舞山

澤通氣道在者尊德成爲貴賈家三虎偉節最怒荀氏
八龍慈明無雙劍光冲斗壁氣浮江據於道德聞於家
邦子之承親温席扇枕子之友悌同與其寢朝歌不入
盜泉不飲垂露崩雲繁絃縟錦明經太學射策鴻都對
揚天子高揖司徒鱗鬪將運波濤不虞子之喪也良可
悲夫瞻望不及佇立以泣惟見黃埃心傷以摧躑躅兮
徘徊嗚呼兮哀哉長夜漫漫何時旦魂兮魂兮歸去來

從弟去溢墓誥銘

處士宏農場去溢年二十卽華山公之曾孫大將軍之

孫朝散大夫鄧州司馬之第四子也維嶽有五有華山
之金石焉山阜相屬含谿懷谷所以鎮其南也維瀆有
四有河宗之玉璧焉波瀾汨起迴洑萬里所以經其北
也言其土地則巨靈之高掌遠躡作西漢之城池敘其
衣冠則太尉之四代五公爲東京之柱國然後積勳累
德枝分葉散大君有命臨夏日之壇場天子動容聽秋
風之金鼓是以熊羆八兆羔雁成羣黃憲之名聞於海
內陳蕃之志掃於天下羣童忽聚逢苦李而先知賓客
相過問楊梅而卽對善父母爲孝善兄弟爲友居家可

移之道也利者義之和貞者事之幹元亨日新之德也
若夫節一作羽陵遺策汲冢殘書倚相之八索九邱張華
之千門萬戶莫不山藏海納學無所遺至如白雪迴光
清風度曲崔亭伯真龍之氣揚子雲吐鳳之才莫不玉
振金聲筆有餘力遠心天授高興生知盡江海之良圖
得烟霞之祕算貞不絕俗從容於名教之場道由人宏
坐卧於羲皇之代於時朝廷之上山林之下英儒瞻聞
之士洪筆麗藻之客希末光而影集聽餘聲而響和者
猶籓籬之望天地鱗介之宗龜龍也嗟乎陰陽爲道大

道無亭毒之心禍福惟人聖人有抑揚之教智焉而斃
仁焉而終今也則亡歎顏回之短命死而可作冀隨會
之同歸文不在茲乎天之將喪也以某年月日終於某
所越儀鳳四年十月二日歸葬於華陰之某原林野彌
望關山寥廓樵童牧豎孟嘗君之池臺一去千年丁令
威之城郭悲纏於魯衛痛深於花萼姜肱沒齒無因共
被之歡鍾毓生年非復同車之樂嗚呼哀哉銘曰

叔虞建國天錫之唐伯僑受氏食采於楊五侯簪紱四
代軒裳有德有行如圭如璋乃生男子初寢之牀從公

小大辨日炎涼天下之寶邦家之光神鋒太峻一作旗
鼓相當事親以禮左右無方交友以信芝蘭有芳文犀
健筆白鳳雕章鵬鷄齊致江湖兩忘謂天輔德則惟其
常殲我吉士于何不傷關山搖落洲渚蒼茫黃塵而地
白露爲霜左右刮骨親賓斷腸摧殘玉樹埋沒金鄉交
交黃鳥爰集于桑命不可續人之云亡

從甥梁錡墓誌銘

故右衛率府翊衛安定梁錡年二十有八以上元三年
秋八月某日終於某所圖其景宿天有大梁之星辨其
物土地有大梁之國考其衣冠人有大梁之姓綜乾坤
而列位兼水土而成文業耕織而樂琴書有梁鴻之雅
尚生封侯而死廟食有梁竦之雄圖西山求曰鹿之仙
東海受黃蛇之寶曾祖某光祿大夫開府儀同三司驃
騎將軍清河太守右衛大將軍同州刺史上柱國郡守
旁通於月建儀同上法於太階光祿大夫下大夫之職
驃騎將軍大將軍之比祖某河南澠池令鄭州司功參
軍事冀州蒲州二府司馬朝散大夫紀王府司馬襄州
同州二長史仲由宰邑蕭何主吏桓溫之徵謝奕暫爲

司馬之官周景之禮陳蕃仍降題輿之命考某國子學
生霍王府參軍并州大都督府兵曹揚州大都督府錄
事參軍仲尼閒居曰參不敏天子命我參卿軍事張常
山之福應直保金鈎謝太傅之閨門惟生玉樹所以圓
光折水真氣衝天孩笑之時見之者知其孝友能言之
際聽之者許其聰明審清河管輅之天文對江夏黃童
之日蝕揮其勁翮則鳳凰飛鳴於赤山整其蘭筋則駿
馬騰驤於綠地若夫神龍負卦瑞雀銜書安釐王汲冢
之文穆天子羽陵之籍莫不因條報葉望表知裏鄭元

殫見覽萬卷之八千班固洽聞涉五經之四部至如瑯
弧夜月筋角三材鐵劍秋霜烟雲五色莫不推之以智
勇成之以揖讓歷諸侯而說劍直之無前引司馬而操
弓觀者如堵可謂多才天縱盛德日新曼倩不讓於詩
書翁歸兼強於文武由是交通遂廣聲名益振朱家大
俠滕公有然諾之言劇孟過人袁盎有逢迎之禮及其
從微至著資父事君藉丹書之勲業參黑衣之行伍神
宮海外瞻鏤榜於明山太室雲端奏仙簧於洛水翊駕
馳道周廬甲觀方當奉詞出使萬里行封受命忘身三

軍拜將豈期年歲朝露浮生過隙漢逸人之雅操命也如何魯司寇之知言苗而不秀嗚呼哀哉望吾子者空懷倚閭之嘆嗟余弟者獨有亡琴之悲從日月於龜謀考圖書於馬鬣越以儀鳳三年春二月某日甲子葬於某所悲夫吾見其進由來孔李之家吾謂之甥實曰何劉之族陽元旣沒瞻舊宅而無成康伯不存對元言而誰與銘曰

山河帶礪金木精靈磊磊千丈森森五兵駢駢西掖出人東明人壽無幾皇天不平碑留郭泰挽送田橫終寂寥於相宅空嗟嘆於佳城

彭城公夫人爾朱氏墓誌銘

夫人爾朱氏河雋洛陽人也若夫陰山表裏衝北斗之璣衡瀚海彌綸直西街之畢昴四時銜火燭龍開照地之光六月搏風大鵬運垂天之翼由是奄有京縣遂荒中土車書禮樂三王之損益可知將相公侯百代之山河不殞祖微隋儀同三司金紫光祿大夫岐同金申信臨徐七州總管兵

集作藩

部尙書金

集作邊

城郡開國公天

列尙書之星地標光祿之塞出身萬里知呂岱之元勳

專命一方識劉宏之重寄父休最隋左千牛備身朝散
大夫齊王府司馬襲封爵金集作城公大夫稱伐諸侯
昨土淮仙致雨仍攀桂樹之山楚客臨風更入芙蓉之
水夫人王臺貞氣金河仙液蔡中郎之女子早聽色絲
謝太傅之閨門先揚麗則彭城公發源殷伯承家漢相
山川氣候彰白虎於臬陶象緯休徵下蒼龍于曼倩三
星照夜佇稽鳴雁之期七日秉秋坐薦飛皇之兆夫人
年甫十八遂歸于我巫山南眺逢暮雨于瑤姬華嶽西
臨降明星於玉女動合詩禮言成軌則晨昏展敬事極

於移天蘋藻挈誠義申于中饋女郎砧石響明月而思

秋風織婦

集作女

機杼聽寒蛩而催絡緯用曹大家之明

訓執宋伯姬之貞節加以心依八覺理會三空遊智刃

於檀林泛仙舟於法海幾神獨照默言象而無施空有

兼忘東筮蹄而不用人生天地壽非金石銀臺竊藥想

奔月而何年金殿

一作玉金集作金釜

煎香思反魂而無日以某

年月日終於平康

集作原

里之私第越上元三年十月二

十日合葬于城南之畢原禮也齊侯寢側杜氏階前對
文王之畢原用周公之合葬偃松千古長無寡鶴之悲

文粹百尋還見雙鴛之集銘曰

合葬非古周公所存死生千載棺槨雙魂野曠風急天
寒日昏烟霾杳嶂霧失遙村紀黃絹之碑表對青松之
墓門

伯母東平郡夫人李氏墓誌銘

夫人姓李氏隴西狄道人也自涼武昭王以後一門三
公爲四海著族國史家牒詳之矣祖充穎後周大將軍
涇州刺史流江郡公考元明皇朝上儀同缺濟三州刺
史成紀縣男出入三朝剖符分竹秦隴河濟之地人到

于今稱之天下士大夫知與不知莫不想望其風采夫
人生而純深幼而恭敬長而敦睦成而和惠年初及笄
甫歸于我執箕帚奉舅姑人不間於其娣姒妾媵之言
閨門之內穆如也故宗黨推其令問鄉閭以爲美談東
平公守清白之基逢太平之日辟命交至聲聞於天詔
徵尚書郎遷御史中丞出爲棣曹恒常四州刺史夫人
輔佐君子聿修內政平旦纒笄則有君臣之嚴沃盥饋
食則有父子之敬報反而行則有兄弟之道受期必誠
則有朋友之信其婦德也如此歷職中外聲名藉甚和

其琴瑟正其邦家者夫人與有力焉蓋常喟然而言曰
古者卿之內子爲大帶命婦成祭服社而獻功可不勛
哉可不勛哉由是服澣濯之衣躬紡織之事筐筥錡釜
之器所以執其勞蘋蘩蕘藻之菜所以明其德非夫博
文達禮貞婉聽從者孰能與于此乎及公乞骸告老退
歸初服夫人年踰耳順視聽不衰每獻歲發春日南長
至羣從子弟稱觴上壽者動至數十百集無百字未嘗不勸
一作言善誘借以溫顏侃侃焉閭閻焉有孟母之風焉
有敬姜之誨焉維永淳元年秋八月旁死魄寢疾彌留

終於華陰之望仙里享年八十有一冬十一月一日丙
辰遷空於永豐鄉之平原從先兆也東平公撫存懷舊
用痛悼于厥心遠近咸集宗親異會生榮死哀其此之
謂矣是日也皇太子監守長安爛忝爲詹事司直不獲
就展集作喪次陪奉靈輶敢薦李顥之文庶同潘岳之
誄嗚呼哀哉銘曰

高岳之上浮雲翔兮函谷之外真氣揚兮建功北狄計
西羌兮受封南鄭家素昌兮於赫祖考爲龍光兮牧州
典郡佩銀黃兮降生淑質秉禎祥兮若華菊茂蘭若芳

兮我有懿德如珪璋兮求之卜筮鳴鳳凰兮君子至止
玉環鏘兮室家好合琴瑟張兮執其麻稟供衣裳兮羞
其饋食澄酒漿兮諸姑伯姊穆溫良兮姨姒叔妹歡未
央兮公之出門牧守四方兮夫人之化德洋洋兮公之
告老返維桑兮閨門之內道彌彰兮正月上日南至長
兮子孫歡慶各稱觴兮宋公集作孟母曾季姜兮匪怒
伊教由舊章兮方期高舉登紫房兮誰謂不宜集作掩
元堂兮肅肅松檟鬱成行兮沈沈厚夕集作終不賜兮
楊盈川集卷九

番禺梁子渭初校
番禺沈葆和覆校

楊盈川集卷十

行狀

中書令汾陰公薛振行狀

高祖德魏給事中黃門侍郎御史中尉散騎常侍直閣
輔國二將軍齊州刺史贈車騎將軍儀同三司華州刺
史諡曰簡懿曾祖孝通魏中書黃門二侍郎銀青光祿
大夫散騎常侍關西道大行臺右丞常山太守汾陰侯
贈車騎將軍儀同三司齊鄭二州刺史祖道衡齊中書
黃門二侍郎隋吏部內史二侍郎上開府儀同三司陵

邛潘襄四州刺史襄州總管司隸大夫皇朝贈上開府
臨河縣開國公父收皇朝上開府兼陝東道大行臺金
部郎中天策上將軍府記室參軍文學館學士上柱國
汾陰縣開國男贈定州刺史太常寺卿諡曰獻河東郡
汾陰縣薛振年六十二字元超狀昔者唐堯之協和萬
邦也有若四岳之敬順昊天歷象日月虞舜之慎徽五
典也有若八元之忠肅恭懿宣慈惠和夏禹之分別九
州也有若皋陶之謨明弼諧允廸厥德殷湯之南征北
怨也有若伊尹之格于皇天姬文之受命作周也有若

號叔之聞于上帝自唐虞而外考及秦漢而無譏元首
必藉於股肱方隆太平之化賢者必待於明主克致崇
高之業若夫驂駕六龍驅馳七聖斟酌元氣裁成天道
者其唯聖人乎宏闡大猷發揮神化匡正八極阜成兆
人者其唯良宰乎我大唐之建國也粵若神堯明揚側
陋文王協於朕卜迎太公於渭水高宗求於朕夢得良
弼於傅巖若歲大旱以爲霖雨若濟巨川以爲舟楫者
也公合天地之間氣依日月之末光能備九德兼資百
行探曠索隱極深研幾齟齬之際羞言霸道詞賦之間

已成王佐六歲襲爵汾陰男十一太宗召見勅宏文館讀書十六爲神堯皇帝挽郎十九尚和靜縣主高宗升儲之日也勅公爲太子通事舍人二十二除太子舍人高宗踐位詔遷朝散大夫守給事中年二十六尋拜中書舍人宏文館學士三十二丁太夫人憂去職起爲黃門侍郎固辭不許修東殿新書畢進爵爲侯公毀瘠過禮多不視事出爲饒州刺史上夢公徵爲右成務四十復爲東臺侍郎是歲也放李義府於邛笮舊制流人禁乘馬公爲之言左遷簡州刺史歲餘上官儀伏誅坐詞

翰往來徙居越嶲五十三赦還拜正諫大夫五十四遷中書侍郎尋同中書門下三品兼檢太子左庶子五十九遷中書令車駕幸洛陽詔公兼戶部尚書與皇太子居守俄以風疾不視事高宗崩輿疾往成都抗表辭位至於再至於三詔加金紫光祿大夫仍聽致仕以光宅元年季冬旁死魄薨於洛陽豐財里之私第嗚呼哀哉公地籍膏腴姻連戚里鼎湖長往拜卿子而爲郎金榜洞開徵列侯而尚主遂乃彈冠筮仕策名委質叩天門於畫闕攀鳳翼於紫宸凡升右轄者一年居外臺者兩

郡四遷門下三人中書用能燮理我陰陽經緯我天地
鹽梅我實鼎梁棟我宸極理百官而察萬人平邦國而
和上下借如風后天老左右軒皇蕭何曹參謀猷漢室
未有一心事主四十餘年參兩宮而出入歷三臺而陟
降合其道也大壑縱其鯤鵬遇其時也名山出其雲雨
功成輔弼德邁幾深星象不憊方踐中台之位山川竝
走竟遊東岱之魂天不憊遺人將安仰越翼日詔贈光
祿大夫使持節都督秦成武涇四州諸軍事秦州刺史
餘如故賜物四百段米粟四百石東園祕器凶事給儀

仗至墓所往還司賓卿監護璽書弔祭別降中使賜歛
衣一襲雜物百段又詔陪葬乾陵依故事也公襲封之
年也受左傳於同郡韓文汪至天王狩河陽乃廢書而
嘆曰周朝豈無良相何得以臣召君文汪異焉神堯皇
帝婕妤河東郡夫人公之姑也每侍高宗詞翰高宗嘗
顧曰不見婕妤姪經數日便謂社稷不安其見重如此
上幸溫泉射猛獸公奏疏極諫上深納焉後因閒居謂
公曰我昔在春宮與卿俱少壯光陰倏忽已三十年往
日賢臣良將索然俱盡我與卿白首相見卿歷觀書傳

君臣共終白首者幾人我觀卿大憐我我亦記卿澤公
嗚咽稽首謝曰老臣早參歷蓋文皇委之以心膂臣又
多幸天主任之以股肱誓期殺身報國致一人於堯舜
伏願天皇遵黃老之術養生衛壽則天下幸甚賜黃金
二百鎰公有事君之節也不亦忠乎每讀孝子忠臣傳
未嘗不慷慨流涕以爲帝舜非孝子朱雲非忠臣客有
譏之者公曰寧有揚君父之過而稱忠孝哉太夫人薨
公每哭嘔血杖而後起上見公柴毀泣曰朕遂不識卿
卿事朕君父一致遂至於滅性可謂孝乎中書省有一

磐石隋內史府君常踞而草詔及公揮翰躍鱗每見此
石未嘗不泣然流涕公有立身之道也不亦孝乎其年
修晉史筆削之美爲當時最孝敬崩詔公爲哀冊上幸
九成宮勅皇太子赴行在所置酒別殿享王公以下時
太子英王侍皇帝酒酒酣公獻壽曰天皇合易象乾將
三男震坎艮今日是也上大悅百官舞蹈稱萬歲賜雜
物百段銀鏤鍾一枚吐蕃不庭詔英王爲元帥總戎西
討公賦西征詩一首上稱善嗟嘆者久之因代英王屬
和御筆繕寫朝以爲榮公有屬詞之美也不亦文乎黃

門侍郎上疏薦高智周任希古郭正一王義方顧徹孟利貞等後皆有重名歷登清貫及兼左庶子又表鄭祖元沈伯儀賀覲鄧元捷顏強學崔融等十人爲學士天下服其知人公爲右成務獻封禪書及平夷策上深納焉或有抵罪者同類數百經赦令獄官評經年不決竟以死論公上疏陳其濫詔百官廷議獄官及諸宰臣未有所決公酬對如響眾咸服焉上嘆息曰幾令我殺無辜之人百寮莫不震懼又上疏陳請備塞垣未幾而匈奴背誕公有神通之鑒也不亦明乎儀表魁傑鬚眉若

畫身長七尺四寸望之儼然喜愠不形於色雖至於近習左右胥徒僕妾莫不待之以禮公有行已之方也不亦恭乎在饒州六年以仁明馭下鄱陽北岡上忽生芝草一株郡人以爲善政所感共起一舍號曰芝亭因立碑頌德公有馭人之術也不亦惠乎在邛都十餘載沈研易象韋編三絕賦詩縱酒以樂當年有醉後集三卷行於世公有安和之德也不亦康乎上初攬萬幾公上疏論社稷安危君臣得失上大驚卽日召見不覺膝之前席嘆曰覽卿疏若暗室而照天光臨明鏡而覩萬象

此後寵遇日隆每軍國大事必參謀帷幄在中書獨掌機務者五年出納帝命口占數百上曰使卿長在中書一夔足矣大駕東巡詔公驂乘上曰朕之留卿若去一目若斷一臂關西事重一以委卿因賜物百段公有社稷之勲也不亦重乎若夫有官功者賜其官族有大行者受其大名公叔列國之陪臣猶安社稷黔婁匹夫之介節不忘仁義古今以爲通訓書籍以爲美談況乎輔佐明主寧濟天下生死無二始終若一業高於六相道貫於五臣其生也榮同心比於周召其死也哀陪葬均

於衛霍豈使易名之典不及於會同賜諡之文不傳於終古門生故吏願述德音博士禮官佇聞清議是則鍾繇之策降於皇魏之年王導之疏寢於中興之日謹狀垂拱元年四月四日故中書令汾陰公府功曹姓名謹狀文昌臺考功竊聞生爲貴臣車服昭其令德死而不朽諡號光其大名今謹按故府主中書令汾陰公贈秦州都督薛元超以王佐之才逢太平之會撫綏萬國康濟兆人力牧輔軒皇未爲盡善臬陶佐大禹猶有慙德名遂身退生榮死哀羽父之請魯君抑唯舊典衛侯之

謚文子庶幾前列謹上

左武衛將軍成安子崔獻行狀

祖宏壽隋獲嘉縣開國侯父萬善皇朝左監門將軍持節隆州諸軍事守隆州刺史

按唐世系表宏壽左監軍夔嘉男萬善閬州刺史

上護軍成安縣開國男謚曰信某郡某縣崔獻年六十七夫推其天命南端上將之文考其地靈北極崆峒之武厭次有東方曼倩早達於孫吳瑯琊有諸葛孔明深期於管樂貞觀九年起家太穆皇后挽郎十六年授營州都督府參軍事燕齊遼遠所以分置營州天子命我

以參卿軍事太宗文武聖皇帝把斧鉞動璇璣發西土之人爰整其旅問東夷之罪恭行天罰公自家刑國資父事君樂王祭之神武棄班超之筆硯一鼓作氣方輕肉食之謀七旬舞于始受昌言之拜二十三年遷徐王府西閣祭酒梁孝王武者漢王之少子廣東苑屬平臺則司馬相如所以騁其詞賦陳思王植者魏國之天人遊西園擁飛蓋則邯鄲子淑所以爲其賓友永徽六年授晉州司士龍朔三年遷岐州司戶翦桐垂棘珪璧相輝紫鳳寶雞休狎至從乾值巽之風土被山帶河之

國邑邦君坐嘯方推太守之名鄰國從遊始屈陪臣之禮尋丁外憂三年泣血一慟能使禽獸莫觸其松柏神仙每留其玉石春秋忽變有君子之終身金革不辭達賢人之俯就麟德元年有詔起公爲左威衛修仁府左果毅都尉仍命羽林軍長上乘輿歷日月步山川詳益地之圖書聽于雲之律呂長城十角盡入提封高闕三襲竝爲州縣於是九姓抗表請築安北府城詔公馳驛許以便宜行事則榮奉中旨計日期還親降鑾輿待於故都樓上雖復東西萬里張博望之尋河裝橐千金陸

大夫之使越猶未聞降星蹕迴帝車擬於陶侃扣天門之八襲方於魯陽留白日照於三舍若夫類上帝徧羣神則孔宣父之所刊者五年一狩登泰山禪梁甫則管夷吾之所識者十有二君秦皇致風雨之迷魏后積貂羊之恥夫名山之所望非我后而誰哉是以馭蒼龍控玉鳳陰陽不測發揮於作樂之文天地無私揖讓於升中之禮公受命陪祠汶上扈蹕梁陰列藩衛於環星受嘉名於捧日與夫茂陵之下獨留符命之書河洛之間不覩漢家之事豈同年而語也朝鮮舊壤歌箕子之風謠

斗骨危城屬烏孫之背誕地惟孤竹不聞謙讓之名親則同株曾無急難之意特進泉男生以蕭牆構葉蔓草方滋欲去危而就安思轉禍而爲福請歸有道使者相望天皇愍一物之推溝詔公於國城內迎接先之以造化之大示之以雷霆之感受其壁焚其櫬更徵侍子來朝京闕亦猶酈生憑軾入齊國而下其城賈誼上疏伏匈奴而笞其背乾封元年詔遷遊騎將軍左威衛義陽府折衝都尉仍加上柱國右羽林軍長上如故是歲也太子太師英國公登壇而拜鑿門而出紫泥明詔不入

於三軍之中黃石奇兵自行於九天之外山林爲室不能有藩籬之險魚鼈成橋不能有逃亡之路詔公出使預參帷幄進奇策納嘉謀攘無臂而執無兵戰必勝而攻必取斬大風之翼霧卷青邱卧長鯨之鱗烟銷碧海二年以平夷功詔除定遠將軍右武衛中郎將檢校左羽林軍總章二年詔遷宣威將軍守左武衛將軍檢校右羽林襲封成安男咸亨二年進爵爲子尋奉別勅檢校右羽林軍餘如故太夫人以桑榆晚節霧露沉痾感年歲之扶危受皇天之賜藥屢陳表疏方請告歸頻降

絲綸未蒙優許則知忠臣奉上多從孝子之門受命臨戎始見忘家之事潘安仁之愷悌始奉板輿張景允之純深終悲畫扇儀鳳三年以內憂解職尋降詔起復本官四年加雲麾將軍正除左武衛將軍檢校右羽林軍如故王人奪服纔聞趙熹之喪明主相憂獨訝何曾之毀且割哀而從禮將以義而斷恩受軍麾命服之數掌期門欣飛之職以漢宮清署忽照邊烽秦塞長城遂聞胡馬匈奴未滅霍去病所以辭家天子動容周亞夫於焉不拜調露元年詔公龍門鎮守兼於夏州防捍飲冰

受命倍道兼行鞍甲成勞晦明爲疾璽書降問即日追還中使接迹於家庭尚藥綢繆於錫賚人生詎幾神道何知仰觀於天值三軍之星落俯察於地逢五將之山崩詔書來北斗之門圖像在南宮之壁以三年秋七月薨於紫桂宮右羽林軍之官第詔賜御食并錦被一張常服一襲雜彩百五十段贈物一百段粟一百石勅書弔贈禮越常班喪用所資數優恒典琳琅觸目日月在懷陶謙則戲列旛旗賈逵則常陳部伍閨門有德歡若友朋事君無隱心如鐵石至如出車授鉞東征西討孤

虛向背則雖女子之衆可以當於丈夫前後折旋則雖婦人之兵可以蹈於湯火免起而鳧舉龍騰而鳳飛無戰不平無城不克有如馮異羞言大樹之功宛似魯連不受黃金之賞太平之事業行矣人主之恩榮備矣山河之寵久預同盟社稷之臣俄悲輟祭聖君興悼列辟相趨覩高鳥而嘆良弓聞鼓鼙而思將帥宏圖祕略實無得而稱焉追遠飾終請有易其名者謹狀永隆二年正月十五日故左武衛將軍安成子府功曹某上尚書省考功名也者功之表也諡也者行之跡也公叔文子

十一鄒氏刊

曾辱四鄰之交黔婁先生有餘天下之貴謹按故府主左武衛將軍上柱國成安子崔獻誕靈辰昴降德山河漢陽閭忠許有良平之策潁川徐庶知其管樂之才生覩太平仕逢明主秋風金鼓有司馬之論兵吉日壇場有將軍之拜職任重而道遠功成而身退奄息百夫之特彼蒼者天相如千載之人猶有生氣珠襦玉匣禮備於喪終筮短龜長事從於先見易名之道蓋取之於舊儀累德之文敢望之於執事謹狀

祭文

為薛令公祭劉少監文

中書令河東薛某謹以清酌中牢之奠敬祭故少監劉
 公之靈惟此陶唐有此冀方上天祚漢人神攸贊開國
 承家枝分葉散三貂赫赫於臺省駟馬諤諤於里閭德
 之有鄰吐符兮降神家之積慶受祿兮宜君星躔可以
 衝南越都邑可以質西秦言鄭公之不死謂張衡之後
 身雍州為積高之地初登吏部尚書郎喉舌之端始拜
 郎官見天子而題柱侍明光而握蘭入麒麟之閣圖書
 掌於河洛測璇玉之機造化窮於制作大風積也方絕

於雲天有力負之生悲於溝壑嗚呼哀哉言念平生求
 其友聲適我願兮共得朋從之道又吾姨也俱承下嫁
 之榮良辰美景必躬於樂事茂林修竹每協於高情援
 菑蘭而無愧指金石以當行誰言倏忽遽隔幽明人非
 兮地是心折兮骨驚卜日兮先遠陰雲凝兮歲將晚臨
 平原兮望行幘君一去兮何時返石室兮沈沈蓬萊山
 兮寂又陰蒼烟漫兮紫苔深陳絮酒兮涕沾襟嗚呼哀
 哉

同詹事府官寮祭郝少保文

少詹事鄧元機永昌令令狐恩府司直王思善楊炯主簿鄭行該等謹以清酌庶羞之奠敬祭太子少保郝公之靈若夫星象降質山川受氣以道爲尊以和爲貴軒后夢之於大澤文王卜之於清渭實憑舟楫之功必藉鹽梅之味昭昭北斗宮號文昌隱隱西掖池名鳳凰增萬幾而參政本定五字而對休光珥豐貂之鞞鞞識遺佩之鏘鏘懸車之歲方稱國老步輦之榮遂居師保劉蕃以光祿緝熙和嶠以尚書贊道百年方享於期頤五福冀徵於壽考西山訪藥北壁尋經金丹不化玉藥何成梁木斯壞曲池坐平府庭颯而變色寮案慘而相驚嗚呼哀哉元機等親聞教義夙承提獎懷德音之不忘痛丹壑之長往門館闐寂簾帷仿像奠行潦之蘋蘩庶明靈之降饗嗚呼哀哉

爲梓州官屬祭陸郵縣文

維垂拱二年太歲丙戌正月壬寅朔二十二日癸亥長史劉某謹以清酌庶羞之奠敬祭陸明府之靈夫萬里之別猶使飲淚成血思德音之斷絕況百年之分能不憂心如熏想公子兮氛氳惟彼積德挺生夫君天垂白

氣地發黃雲江則有汜為國之紀君傳其政愛人如子
 山則有梁鎮茲一方君宏其道視人如傷久勞於外路
 阻且長曾未期月人之云亡嗚呼哀哉哀哀弱嗣朝暮
 一溢皎皎孀妻頽乎下室蜀門如劍長安如日歸路何
 從我心如疾嗚呼哀哉凡我在位羈官邊城共戮力兮
 誰言死生思其人兮造其尸庭恍無見兮寂無聲稱觴
 兮酌酒心折兮骨驚嗚呼哀哉

祭汾陰公文

維大唐光宅之元祀太歲甲申冬十有二月戊寅朔丁

亥御辰楊炯以柔毛清酒之奠敢昭告於故中書令汾
 陰公之貴神惟公含純德而載誕兮稟元精而秀出備
 百行而立身兮半千年而委質屬天地之貞觀兮逢聖
 人之得一若夔龍稷卨之寅亮舜朝兮若蕭曹魏邴之
 謀猷漢室懸大名於宇宙兮立大勳於輔弼如何斯人
 而有斯疾曾未遐壽中年殞卒嗚呼哀哉若夫家傳寶
 鼎地闢金樓一作溝文則屬詞而比事兮學則八索而九
 邱入則東藩之上相兮出則南面之諸侯惟盡善兮未
 善固雖休而勿休既知退而知進兮亦能剛而能柔大

才則九功惟叙兮大智則萬物潛周崇德廣業兮樂天
知命而不憂嗚呼哀哉門館虛兮寂寞歲窮陰兮搖落
備物儼兮如存光靈眇兮焉托垂總帷與祖帳兮罷歌
臺與舞閣天子惜其毗余兮羣臣思其可作嗚呼哀哉
拊循兮弱齡叨襲兮簪纓公夕拜之時也旣齒跡於渠
閣公春華之日也又陪遊於層城參兩宮而承顧盼兮
歷二紀而洽恩榮郭有道之青目兮蔡中郎之下迎條
焉今古非復平生無德不報兮願摩頂而至足有生必
死兮空飲恨而吞聲天慘慘兮氣冥冥月窮紀兮日上

丁藉白茅兮无咎和黍稷兮非馨嗚呼哀哉

楊盈川集 卷十

楊盈川集 卷十

鄒氏刊

鄒氏刊

楊盈川集卷十

番禺梁于渭初校

番禺沈葆和覆校

